

PROKLAMASIE NO. R. 19 VAN 2017**van die
PRESIDENT van die REPUBLIEK van SUID-AFRIKA****WET OP SPESIALE ONDERSOEKEENHEDE EN SPESIALE TRIBUNALE, 1996
(WET NO. 74 VAN 1996): VERWYSING VAN AANGELEENTHEDE NA
BESTAANDE SPESIALE ONDERSOEKEENHEID**

AANGESIEN bewerings soos beoog in artikel 2(2) van die Wet op Spesiale Ondersoekeenhede en Spesiale Tribunale, 1996 (Wet No. 74 van 1996) (hierna na verwys as die "Wet"), gemaak is in verband met die aangeleentheid van die Alfred Nzo Distriksmunisipaliteit (hierna na verwys as "die Distriksmunisipaliteit");

EN AANGESIEN die Distriksmunisipaliteit verliese gely het wat verhaal kan word;

EN AANGESIEN ek dit nodig ag dat gemelde bewerings ondersoek en siviele geskille voortspruitend uit sodanige ondersoek bereg moet word;

DERHALWE verwys ek hierby, kragtens artikel 2(1) van die Wet, die aangeleentheid in die Bylae vermeld, ten opsigte van die Distriksmunisipaliteit, vir ondersoek na die Spesiale Ondersoekeenhede ingestel by Proklamasie No. R. 118 van 31 Julie 2001 en bepaal dat, vir die doeleindes van die ondersoek van die aangeleentheid, die opdrag van die Spesiale Ondersoekeenhede is om soos beoog in gemelde Wet, ondersoek te doen na enige beweerde—

- (a) ernstige wanadministrasie in verband met die aangeleentheid van die Distriksmunisipaliteit;
- (b) onbehoorlike of onregmatige optrede deur raadslede, beamptes of werknemers van die Distriksmunisipaliteit;
- (c) onregmatige bewilliging of besteding van publieke geld of eiendom;
- (d) onwettige, onreëlmatige of nie-goedgekeurde verkrygende handeling, transaksie, maatregel of praktyk wat op Staatseiendom betrekking het;
- (e) opsetlike of nalatige verlies van publieke geld of skade aan publieke eiendom;
- (f) misdryf bedoel in Dele 1 tot 4, of artikel 17, 20 of 21 (vir sover dit op voornoemde misdrywe betrekking het) van Hoofstuk 2 van die Wet op die Voorkoming en Bestryding van Korrupte Bedrywighede, 2004 (Wet No. 12 van 2004), en welke misdrywe gepleeg is in verband met die sake van die Distriksmunisipaliteit; of
- (g) onwettige of onbehoorlike optrede deur enige persoon wat ernstige benadeling vir die belange van die publiek of enige kategorie daarvan veroorsaak het of kan veroorsaak,

wat plaasgevind het tussen 1 Januarie 2014 en die datum van publikasie van hierdie Proklamasie of wat plaasgevind het voor 1 Januarie 2014 of na die datum van publikasie van hierdie Proklamasie, wat relevant is tot, verband hou met, insidenteel of bykomstig is tot, die aangeleentheid vermeld in die Bylae of wat dieselfde persone, entiteite of kontrakte betrek wat ondersoek word kragtens die volmag verleen deur hierdie Proklamasie, en om al die werksaamhede en bevoegdhede wat deur die Wet aan die gemelde Spesiale Ondersoekeenhede toegewys of opgedra is, uit te oefen of te verrig in verband met die genoemde aangeleentheid in die Bylae, insluitend die verhaal van enige verliese wat deur die Distriksmunisipaliteit gely is.

Gegee onder my Hand en die Seël van die Republiek van Suid-Afrika te Pretoria op hede die Tiende dag van Maart Twee duisend-en-sewentien.

J G Zuma
President

Op las van die President-in-Kabinet:

T M Masutha
Minister van die Kabinet

BYLAE

1. Die aanskaffing van, of kontraktering vir goedere, werke of dienste deur of namens die Distriksmunisipaliteit en betalings wat in verband daarmee gemaak is op 'n wyse wat—

- (a) nie regverdig, mededingend, deursigtig, billik of koste-effektief was nie; of
- (b) strydig was met toepaslike —
 - (i) wetgewing;
 - (ii) handleidings, riglyne, praktyknotas, omsendskrywes of instruksies wat deur die Nasionale Tesourie of relevante Plaaslike Tesourie uitgevaardig is; of
 - (iii) handleidings, beleid, prosedures, voorskrifte, instruksies of praktyke van, of wat op die Distriksmunisipaliteit van toepassing is,

en enige verwante ongemagtigde, onreëlmatige of vrugtelose en verspilde uitgawes wat deur die Distriksmunisipaliteit aangegaan is ten opsigte van—

- (aa) die verskaffing, lewering, installering of indiensstelling van water opgaar fasiliteite of tenks of Kontraknommer ANDM/IDMS-WSP/05/20/03;
- (bb) die “Matatiele Ward 7 Water Supply Project” of Tondernommer ANDM/IDMS-PMU/300/25/03/14; en
- (cc) 'n inkomste en rekeningbestuursoplossing of Tondernommer ANDM/IDMS/-WSP/165/19/11/14.

2. Wanadministrasie in die aangeleenthede van die Distriksmunisipaliteit en enige verliese of nadeel wat deur die Distriksmunisipaliteit gely is as gevolg van sodanige wanadministrasie ten opsigte van—

- (a) die verskaffing, lewering, installering of indiensstelling van water opgaar fasiliteite of tenks of Kontraknommer ANDM/IDMS-WSP/05/20/03;
- (b) die “Matatiele Ward 7 Water Supply Project” of Tondernommer ANDM/IDMS-PMU/300/25/03/14; en
- (c) 'n inkomste en rekeningbestuursoplossing of Tondernommer ANDM/IDMS/-WSP/165/19/11/14,

en betalings wat in verband daarmee gemaak is, insluitende die oorsake van die wanadministrasie en verwante ongemagtigde, onreëlmatige of vrugtelose en verspilde uitgawes wat deur die Distriksmunisipaliteit aangegaan is.

3. Enige onbehoorlike of onwettige optrede deur die raadslede, beamptes of werknemers van die Distriksmunisipaliteit of die betrokke kontrakteurs, verskaffers of diensverskaffers of enige ander persoon of entiteit, ten opsigte van die bewerings uiteengesit in paragrawe 1 en 2 van hierdie Bylae.